

07 MAY 2002

Lubnan-Tiba/I

PERDANA MENTERI LUBNAN TIBA UNTUK LAWATAN TIGA HARI

KUALA LUMPUR, 7 Mei (Bernama) -- Perdana Menteri Lubnan Rafic Hariri dijadual tiba di sini malam ini untuk lawatan tiga hari bagi memperkukuhkan hubungan antara kedua-dua negara.

Beliau akan diringi Menteri Kewangan, Menteri Kerja Raya dan Pengangkutan, Gabenor Bank Pusat dan beberapa ahli perniagaan, demikian menurut kenyataan Wisma Putra hari ini.

Menurut kenyataan itu, Perdana Menteri Datuk Seri Dr Mahathir Mohamad akan meraikan Hariri pada jamuan tengah hari di Seri Perdana esok.

Hariri kemudiannya akan melakukan kunjungan hormat ke atas Dr Mahathir.

Kenyataan itu menyebut Hariri dijangka membincangkan isu-isu dua hala, serantau dan antarabangsa yang mempunyai kepentingan bersama.

Semalam, dalam jawapan e-mel kepada Bernama Hariri berkata beliau akan membincangkan situasi di Asia Barat dengan Dr Mahathir selain kaedah untuk memperkukuhkan hubungan dua hala.

"Saya akan berbincang dengan Perdana Menteri mengenai situasi di Timur Tengah dan keamanan di rantau itu memandangkan ia merupakan topik yang sentiasa diberi perhatiannya (Dr Mahathir) yang cintakan keamanan, pemimpin Islam dan sebagai rakan dunia Arab yang sentiasa menyokong perjuangan rakyat Palestin dan hak orang Arab," katanya.

-- BERNAMA

AZZ AZZ LAT